



Kommune Kujallermi  
Inuit Ataqatigiit  
politikkikkut anguniagassatut  
2024-miit 2025-mut  
Isumaqatigiissutaat

(qinigaaffik **2021-2025**)

*Kujalleq ataatsimoortoq uummaarissoq eqeersimaartorlu*

*Nammineq pilersornerulernissamik inerisaaffiusoq*

*Oqartussaaqataaneq peqataatitsinerlu tamanut*

**Aallarniut:**

Kommune Kujalleq tassaavoq nunatsinni imminut pilersornissamut periarfissagissaartoq. Illoqarfinni nunaqarfinni savaateqarfinnilu nunatta siuariartortinnissaanut piginnaaneqarluartunik innuttalik.

Ukiorpasuaarni uumasuuteqarnermik, nunalerinermik inuussutissarsiutinillu allanik ingerlatsiffiusoq, annertuumillu ineriartooqinnissaminut periarfissaqartoq.

Nammineerluni pilersornerulernissamut sulianik pilersitsinissarput qilanaarluta ingerlatissavarput. Uumasunik neqiliortuniippat, naatitalerinermiippat, aqquuserniormiippat, aalisarnermiippat allatigulluunniit nunami imaanilu ingerlatassanik nutaanik inerisaanermiippat.

Aatsitassarsiorneq mingutsitsinermik kingunipiluttussaangitsumillu siunertalik tikilluaqqarput.

Kommunitsinni piginnaasatta atorluarneqarlutik pilersaaruserifigineqarnissaat Inuit Ataqatigiit Demokraatillu siuttuuffigissavaat. Upperaarput nammineerluta pilersitatsinnik kommunerput siuariartortissinnaallugu, aqutsinikkullu naleqartipparput innuttaasut siuariartornernut piginneqataasut akuutinneqartutullu misigisimasut.

Inuussutissarsiutitigut siuariartorneq innuttaasut piginnaasaannik atuinikkut pinissaa qulakkeerlugu suliaqassaagut. Kommune Kujalleq tamanut suleqatiserinnittuussaaq, nunatsinniillu naalakkersuinikkut, komuunitsinnilu anguniakkani inuussutissarsiutitigut siuariartortinnissaa siunertaralugu sulissaagut.

Kommune Kujalleq ataatsimoornikkut nutaaliornikkullu ineriartorfiunissaa kissaatigaarput, innuttaasut sinniisaasa suliaassaraat ataatsimoorfiusumik siuariartortitsineq.

Qinigaaffiup sinnerani suleqatigiilluarnissamik kissaassillunga.

Stine Egede,

Kommune Kujallermi borgmesteri.

### **1. Kommunimi uranitalinnik piiasoqassanngilaq:**

Urani naamik- ineriartorneq minguitsoq - Kujalleq qorsuk imaatigut nunamilu inuussutissaqarfissuaq.

### **2. Kommunimi allaffissornikkut ingerlatsinikkullu aaqqissuuse.qqinneq:**

Kujalleq imminut napatittoq, aaqqissuuseqqinneq susassaqartunik tamanik, minnerunngitsumik kommunimi sulisunik peqataatitsinikkut piviusunngortinneqassaaq.

Kommune ammasoq innuttaasunillu peqataatitsisoq - saaffiginnissutininik ingerlaavartunik sukkasuumik inussiarnersumillu tamanut sullissisoq.

Nanortalimmi Narsamilu kommunip allaffiini ulluinnarni "Pisortanik" inissiisoqassaaq. Ulluinnarni pingaarnertut isumaginninnikkut teknikkeqarnikkullu aalajangigassanut akisussaasuussapput. Qitiusumi Isumaginnittoqarfiup pisortaa aamma Teknikkeqarfiup pisortaa qanimut suleqatigilluinnarneqassapput.

Qinikkat saaffigiuminartut suliassanik susassaqartunut ingerlatitseqqittartut innuttaasunullu sutigut tamatigut peqataatitsisut saaffigiuminartullu pilersissavagut.

Kommunip allaffii ittoornanngitsut saaffigiuminartullu pilersinneqassapput.

Kommunimut saaffiginninnermi innuttaasut toqqisisimallutik saaffiginnissuteqartarnissaat qularnaarneqassaaq, saaffiginnittarfiit aaqqissuuteqqinnerisigut.

Aningaasassarsiortartumik atorfinitsitsissaagut.

Sulisut ataavartumik pikkorissartuarnissaat qularnaarneqassaaq.

### **3. Innuttaasunut paasissutissiisarneq:**

Innuttaasunut paasissutissiisarneq ullumikkornit pitsaanerulissaaq, tamanna innuttaasunik ukiumut arlaleriarluni naapitsisarnikkut ingerlanneqartassaaq.

Kommunip quppersagaa atoruminartuq paasiuminartorlu pilersinneqassaaq.

Naqitatigut, qarasaasiatigut innuttaasullu qinikkanik kiinarsillutik naapitsisarsinnaanerit aamma periarfissinneqassaaq.

### **4. Aningaasaqarnikkut ingerlatsineq:**

Kommune Kujalleq aningaasaqarni kut akisussaassuseqartumik eqqortumillu ingerlatsiffiusoq.

Kommune aningaasatigut ingerlatsinermini innuttaasunut paasissutissiisassaaq nittartagaq minnerunngitsumillu ataatsimiisitsisarnerit allallu aqputigalugit.

## **5. Nunaqarfiit:**

Nunaqarfiit aningaasatigut ingerlatsinikkullu namminneq pisariaqartititik naapertorlugit ingerlasut - naatsumik oqaatigalugu nunaqarfiit nappaqqillugit!

Nunaqarfinni illuutit asiulersut "pigineeruttut" misissuiffigineqassapput, piiagassat peerlugit, piginnittulli peqatigalugit iliuseqarfigalugit.

Puttasulersuineq nanginneqassaaq. Puttasut ninngusuut ukioq naallugu atorsinnaasunik tullerriaarineq, inoqassuseq takornarialerinerlu aallaavigalugit inerisaneqassapput.

Nunaqarfiit kommunitoqqat malillugit illoqarfittaminnit sullinneqassapput, allaffiilu pisariaqartitsineq napertorlugu inuttaliinikkut akisussaaffeqartinneqassallutik.

Sunngiffimmi susassaqartitsinikkut inerisaasoqassaaq, meeqqat atuarfii illut sulliviillu atorluarlugit.

Pisariaqartitsineq aallaavigalugu meeraaqanik meeqqanillu paaqqinnissinnaaneq periarfissanngussapput.

Pisariaqartitsineq aallaavigalugu illuliorsinnaaneq aqputissiuunneqassaaq.

## **6. Isumaginninneq:**

Innutaasunik isumaginninnikkut akisussaassusilimmik inuppalaartumillu ingerlatsisoq. Ilaqutariinnik, meeqqanik inuusuttunik, innarluutilinnik utoqqarnillu isumassuisoq.

Isumaginninnermi sulisutigut naammattunik inuttaqartoq.

Utoqqaat illuini sulisut naammattut malinnaasinnaasullu pilersissavagut.

Kommune meeqqanut, inuusuttuaqqanut, innarluutilinnut, tarnikkut nappaatilinnut, utoqqarnullu susassaqartut peqatigilluinnarlugit sullississaaq ineriartortitsillunilu.

Meeqqat atuarfiini tamani isumaginninnermi siunnersortinik kiisalu perorsaasunik pilersitsisoqassaaq.

Pinaveersaartitsineq annertoq, politiit, peqqinnissaqarfik sammisarlu aallaavigalugu susassaqartut peqatigalugit pimoorullugu ingerlanneqassaaq. Tassani annertuumik kinguaassiutitigut atornearluisarnerup annikilliarortinnissaanik pimoorussamik sulineq qitiussaaq.

Naartuersittartut ikilisarneqarnissaat anguniarneqassaaq.

Anaanangujaartartut angajoqqaanngujaartartullu peqqinnissaqarfik peqatigilluinnarlugu aallartilluarnissaat siunertarlugu pikkorissaanerit ikorfartuinerillu ingerlanneqassapput.

Atornerluisut katsorsartikkusuttut sivisuunik utaqqisarnerat peqqinnissaqarfik suleqatigilluinnarlugu pimoorullugulu allanngortinneqassaaq.

Kinguaassiutitigut atornerlunneqarsimasut ikiorserneqarnissaminut piaarnerpaamik iliuseqarfigineqartassapput.

Kinguaassiutitigut atornerluisoqarsimaneranik paasisaqartoqartillugu / pasitsaasisimasoqartillugu piaarnerpaamik suliassamik aallartitsinissaq isumannaarneqartassaaq.

Meeqqat angerlarsimaffiup avataanut inissinneqannginnissaat anguniarlugu annertuumik suliaqassaagut.

Meeraq angerlarsimaffimminiiginnarnissaa anguniarlugu angajoqqaanik siunnersuisalernissaq aqutissiuunneqassaaq.

Angerlarsimaffimmi ikiortinik pikkorissaaneq.

## **7. Atuarfeqarneq meeqqeriveqarnerlu:**

Meeqqat atuarfiini inatsisit malitassat eqqortumik malinneqassapput.

Meeqqat atuarfiini nerisaqartitsineq eqqunneqassaaq.

Meeqqat atuarfii nunaqariaasitsinut tulluurtumik aqqqissuunneqassapput, Inatsisartullu peqatigalugit inatsit aqqqissuunneqartassalluni.

Atuartut angusartagaasa qaffassarnissaat angajoqqaat sinniisaat angajoqqaallu peqatigilluinnarlugit anguneqassaaq.

Atuarfiit nuannersut- uummaarissut, aalaakkaasunillu ilinniartitsisullit pisariaqarteqisagut susasaqartut peqatigalugit pilersinneqarnissaat sulissutigineqassaaq.

Ilinniartitsisussaaleqisoqartillugu meeqqat angerlartiinnarneqartassanngillat.

Meeqqat Atuarfiini naammassisut ilinniarfeqarfinnut ingerlariaqqittarnissaat aqutissiuulluartaqarparput, qulakkeerumallugu inuusuttut ingerlariaqqittarnissaat

Meeqqeriviit pitsaassusaat nalunaarusiorneqartalissapput, atuisut tamaviisa pitsaasunik aqutissiuunneqartarniassammata.

Meeraaqqerivinni meeqqerivinnilu sulisut amerlanerpaat ilinniarsimasuunissaat, kiisalu ilinniarsimangitsut pikkorissartinneqartarnissaat piaartumik aqutissiuunneqassaaq.

Meeqqeriviliorerit ingerlareersut ingerlaannassapput. Tullinnguullugu Nanortalik

sanaartorfineqassaaq, kingulliullugulu Narsaq.

Atuarfiup aaqqissuunneqarnera pitsaasuusariaqarpoq nunap immikkoortuanut tulluarsarlugu.

Atuartut nunaqarfinneersut savaateqarfinningaaneersullusivisunerpaamik angerlarsimasarnissaat anguniassavarput.

Atuartitsineq pitsaassappat, sulisunut atuartunullu pitsaasumik atugassaqartitsinissaq pingaaruteqarluinnarpoq. Atuarfiup aaqqissuussaanerata pitsaasuunissaa anguneqassappat, ilaatigut makku pingaaruteqarput.

Atuartunik holdikkaarilluni atuartitsineq.

Familieklasse.

Ilinniartitsisut sukkuunniit supervisionertinneqartarnissaat.

Atuakkat atuartitsissutit pitsaasut faginut naleqquttut ineriartuutaasullu amerlisarneqarnissaat.

Ilinniartut meeraasa meeqqeriveqalernissaat Naalakkersuisunut noqqaassutigineqassaaq.

## **8. Kulturikkut timersornikkullu ingerlatsineq:**

Kulturikkut, anersaakkut timersornikkullu sumiiffinni tamani sutigut tamatigut pikialaartitsiffiusoq.

Timersornikkut kommune annertusisamik inerisaavigineqassaaq, kommunip iluani unammuaarnerit annertusarneqassapput, pingaarnertut meeqqat inuusuttuaqqallu eqqarsaatigalugit.

Peqatigiiffilerisut allaffeqarnikkut, ataatsimiittarfeqarnikkullu periarfissaqalissapput.

Avataaniit aliikkusersuiartortut tikissatillugit, sapinngisamik kommunimi illoqarfiit tamakkerneqartassapput.

Najukkani ataatsimiititaliat kommunimit qanimut suleqatigineqarluassapput.

Nanortalimmi timersornikkut højskoleqalernissaa Naalakkersuisut peqatigalugit periarfissarsiunneqassaaq.

## **9. Sunngiffik:**

Inuusuttuaqqat inuusuttullu sunngiffimmi ornittagassaannik pilersitsinissat pilersarusiorneqassapput.

Timersortarfiit aas anerani ammasarnissaat pilersarusiussaaq.

Silami timersuutinik assigiinngitsunik ingerlatsinernik inerisaasoqassaaq, ilaatigut pinngortitamik avatangiisinillu atorluaniikkut.

Nunaqarfiit illoqarfiillu meeqqanut pinnguartarfeqalernissaat anguniassaaq.

## **10. Ineqarneq:**

Innuttaasunut tamanut inissaqartitsinikkut inissianillu sanaartornikkut siuariartorfiusaaq - Angerlarsimaffeqanngitsoqassanngilaq! Qinigaaffik naatinnagu angerlarsimaffeqanngitsunut unnuisarfinnik pilersitsissaagut.

Kommunip inissiaatileqatigiiffiata, Iserit A/S-ip, inissiaatit kommunitssinniittut tamakkerlugit ingerlatarilissavai.

Tarnimikkut innarluutillit pitsaasunik tulluurtunillu angerlarsimaffeqalissapput.

Innarluutillit illoqarfinni nunaqarfinnilu tamani tikikkuminartunik angerlarsimaffeqarnissaat aqutissiuutissavagut.

Inissiat utoqqarnut tulluarsakkat naammattut 2030 tikitsinnagu pilersaaruserluarlugit sanaartorneqassapput, aamma nunaqarfittatsinni.

## **11. Inuussutissarsiutit:**

Inuussutissarsiornikkut imaani nunamilu Kommune Kujalleq ineriartortitsisoq namminerlu pilersornissamik siunertalik- nunatta sinneranut aamma pilersuisoq anguniarneqassaaq. Tamanna pissaaq uumasuutillit, nunalerisut, aalisartut, piniartut takornarialerisut aamma Innovation South Greenland (ISG) qanimut suleqatigilluinnarlugit. Tamanna anguniarlugu ISG-mut tunngatillugu kiffartuussinissamik isumaqatigiisummi nunatta kujataani imminut pilersornikkut inerisaaneq annertuumik ineriartortinneqaqqullugu piumasaqaateqartoqassaaq.

Uumasuuteqarnermut nunalerinermullu allattoqarfiup tamakkiisumik Narsamut katersorneqarnissaa Naalakkersuisunut piaartumik noqqaassutigineqassaaq.

ISG-p inerisaqqinnissaanut periarfissanik tamatigut tapersersuissaagut, qanimullu suleqatigineqarluassalluni. Aningaasaleeqqiffigineqarnissaa qulakkeerneqassaaq.

Takornariaqarnermi kommunalbestyrelsimi pilersaarut akuersissutigineqartoq ineritilluarneqassaaq.

Savaateqarfinni takornarialerinikkut inerisaaniarneq kommunimit ISG peqatigalugu annertuumik tapersersorneqassaaq, periarfissat aallaavigalugit inerisaqqinnikkut.

Nunat eqqissisimatitanngortitat nalilersoqqissaarneqassapput, takornariaqarnermilu atorneqarsinnaaneri siunertaassalluni.

Aasaanerani nunat savanut neriniartitsiviusartut aatsitassarsiorfissatut periarfissaatillugit misissuiffigineqartarnerat piivillugu peerneqartariaqarpoq, Naalakkersuisut peqatigalugit.

Uumasuuteqarnermik nunalerinermillu qitiusumik oqartussaaffiup Narsami kateriffeqalernissaa anguniarneqassaaq.

Piniarnermiut nakkutilliisoq Naalakkersuisut peqatigalugit Kommune Kujallermi pilersissavarput.

Qinigaaffimmi Kommune Kujallermi umimmanniarsinnaaneq pisinnaanersoq nalilersuiffigineqassaaq.

Inuussutissarsiortut aallartisartullu ikorfartorniarlugit kommunemi ISG peqatigalugu Start-Up aningaasalersorneqartalissaaq.

### **12. Sulisinnaanngorsaaqqinneq:**

Inatsisit atuuttut aallaavigalugit, pisinnaatitaaffillu innarlernagit inerisaasinnaaneq qulaajarneqassaaq, sulisussaaleqilertarneq annikinnerpaaffissaaniitilerlugu.

Qaqortumi "Qisuk" pilersinneqaqqissaaq.

### **13. Aalisarneq:**

Tunisassiorfiit Naalakkersuisullu qanimut suleqatigalugit aalisartunut killilersuinngitsumik tunisassiorfeqarnissaaq anguniarneqassaaq.

Aalisartut siuarsarnissaminut periarfissarsiuunneqassapput Innovation South Greenland suleqatigalugu, soorlu angallatinik anginerumaanik pisiniarsinnaanermut Naalakkersuisut peqatigalugit attartortitsivimmik pilersitsinikkut.

Kangerlunni raajarniarnissamik ammaassinissaaq Naalakkersuisut peqatigalugit piviusunngortinniarneqassaaq.

Kommunip imartaani titarnerup kujammut sammisup avammut illuartinnissaa Naalakkersuisut peqatigalugit suliarineqassaaq.

Kujataata imartaani aalisarneqartut kommunetsinnut tunineqartalernissaat aqqutissiuunneqartariaqarput.

### **14. Narsarsuup siunissaa:**

Qaqortumi mittarfiup pilersinneqarnissaa utaqqinagu, Narsarsuup qanoq siunissami atorineqarnissaa pineqartut peqatigalugit ingerlanneqassaaq. Maannamut suliat ingerlareersut Naalakkersuisut peqatigalugit p1ngaartillugillu nangeqqinneqassapput. •

Kommune Kujalleq silaannakkut avammut attaveqartuassasoq qulakkerneqassaaq, ukiorlu kaajallallugu timmisartuussisinnaasunik ujartuisoqassalluni.



Narsarsuarmi akunnittarfiup nutarterneqarnissaa Naalackersuisunut suliakkiissutigineqassaaq.

Sikublokkip Narsarsuarmi pilersinneqarnissaa aqutissiuunneqassaaq.

#### **15. Avatangiisit, eqqaaveqarneq eqqagassallu:**

Inoqarfinni tamani eqqiluisaarnikkut periarfissat nutarterneqassapput.

Ukiut tamaasa saviminikunik katersineq aningaasaliiffigineqartassaaq, savaateqarfinni nunaqarfinnilu nungunnissaasa tungaannut.

Kangerluit tulleriiarlugit aaqqissuussamik nammineq kajumissutsimik peqataaffigineqartumik salinneqartassapput, minnerunngitsumik plastikkinik mingutsitsineq aamma eqqarsaatigalugu.

Ukiut tamaasa upernaakkut illoqarfiit nunaqarfiillu salinneqartassapput. Talittarfinni - piniartut talittarfiini saliineq annertoq ingerlanneqartassaaq.

Biilit angallatillu atorneqanngitsut peerneqartassapput, piginnittui susassaqartullu allat peqatigalugit. Pigineqanngitsutut nalunaarsukkat kommunip akisussaaffigisaanik katersorneqartassapput, isumannaatsumillu sumut eqqarneqartarnissaat nalilersorneqartassaaq.

Batteriikunik, qullit pærikuinik assigisaannillu eqqaavinnik pilersitsisoqassaaq.

#### **16. Aqquserngit:**

Kommune Kujallermi illoqarfinni aqquserngit tulleriiarlugit asfalterneqassapput.

Savaateqarfiit illoqarfiillu akornanni aqquserniornerit ataatsimut isigalugit pilersaarusionneqassapput, takornariaqarnermut aamma narsaatini naatitaateqarnermut iluaqutissanngorlugit.

Narsarsuup kuaata ikaartarfissaa qinigaaffiup nutaap ingerlanerani pilersinneqassaaq, Qajjitanullu aqutissaaq ikaartarfillu ingerlanneqartoq nangillugu naammassineqassalluni.

#### **17. Errorsisarfiit:**

Nanortalimmi errorsisarfik pilersinneqassaaq.

#### **18. Anartarfiit:**

2030-mi angerlarsimaffiit tamarmik kuuginnartunik imaluunniit ikuallattakkanik ana rtarfilersorneqarsimas sapput.

#### **19. Imeqarneq:**

2030-mi Kommune Kujallermi angerlarsimaffiit tamarmik kuuginnartumik imeqalersimanissaat sulissutigineqassaaq.

## 20. Kommunenit tamanit aalanerpaaniarpugut


Inuup peqqissusaa pingaarutilissuvoq, ilaqutariit nukittuut peqqinnerusullu kommunenitsinni aalanerunissaat kommunemit kaammattorumallugit, meeqqerivinni, atuarfeqarfinni, utoqqaallu illuini pilersaarusiortoqassaaq, nunarsuarmi 2030-imi aalanerunissaq anguniarlugu suliniutillit peqatigalugit.

## 21. Aatsitassat

Aatsitassarsiorneq mingutsitsinermik kingunipiluttussaannngitsumillu siunertalik tikilluaqquarput Naggasiut

Isumaqatigiissut manna tunngavingalugu qinigaaffiup sinnerani ataatsimiititaliani suliasat tulleriarneqarneri ataatsimiititaliat kiffaannngissuseqarfigissavaat. Tunngaviusumik isumaqatigiissut manna qitiutillugu ataatsimiititaliani sulinerit ingerlanneqassapput.

Atsiorneqarpoq ulloq 1. juli 2024



Stine Egede,  
Inuit Ataqtigiit.

-